

Carex canescens, var. *subloliacea*, (vide infra). *Carex Buxbaumii*, var. *subcaespitosa*, i); et *Carex limosa* a. in paludibus profundis. Hæc omnia gracilescent ob loca, plus minus aqua inundata.

§. 28.

Aliud ejusdem argumenti. Salices omnes, in vel juxta aquam enatæ, gracilescent; unde ramuli tenues, et folia proinde angustata facta; quibus rebus maximam cum *S. rosmarinifolia* habent similitudinem. Quare hanc quoque meram *S. fuscae* varietatem esse crediderim; quia ad littora maris, sæpius inundata habitare dicitur k). Nam amenta Salicum abbreviari videmus, cum eum in statum venerint, ut amenta vix explicare possint, sive ob abundantem aquam, nonnihil fructui detrahentem, sive ætate, sive aliis rationibus, quæ amenta præcocia serotina reddunt.

§. 29.

Non dubito plerasque exstitisse plantarum formas istiusmodi soli locique mutationibus. Quia vero causæ

i) Gracilescens, foliis angustatis longioribus; spiculis femineis binis; mascula terminali. Hab. cum *Carice livida* in paludibus profundissimis.

k) Specimina *S. rosmarinifolice* simillima, in litore marino Vestrobottinæ legi, quæ ad fuscæ aperte pertinebant.